

PROYEKTO BÒIKOTIÁ

KPCN reforsá ku 15 agente polisial nobo



Riba djabièrnè 10 di mart, durante seremonia di entrega di diploma e agentenan polisial nobo di Kuerpo Polisial Hulanda Karibense ofisialmente a terminá nan estudio di polis. Foto ta muestra e polisnan nobo den KPCN.



Konteo voto
diferente
PAG 5


cityshopbonaire.com
City Shop Bonaire
+599 700.6442
+599 717.3666
City Shop
Smart shopping • Better living

Flur pa fe-
ver den 5
siman
PAG:14

MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA

xerox™
OBERSI
ELECTRONICS
BONAIRE

2X Double Points Tuesday!
ALL DAY EVERY TUESDAY!
Earn Double Points on your Club Card
Open Monday - Saturday 8pm to 4am | Sunday 7pm to 3am | (599) 717-3504
diviflamingocasino.com | ATM available
DIVI FLAMINGO CASINO



Met groot verdriet hebben wij kennis genomen van het overlijden van ons oud-lid, past President en Past Secretary van Rotary Club Bonaire

Dhr. Jan Kloos

*3 december 1939 - † 7 maart 2023

Echtgenoot van Margreth Kloos-Mulder

Wij wensen Margreth, de kinderen, de kleinkinderen en vrienden veel sterkte met dit verlies.

Bonaire, 13 maart 2023
Rotary Club Bonaire

Dag jij

A fayesé inesperá nos kasá, tata i welo

Johannes 'Jan' C. Kloos

"Officier in de Orde van Oranje Nassau"

*Schiedam 03-12-1939 † Bonaire 07-03-2023

Jan no tabata klá pa bai ainda. E tabata yen di plan pa futuro (E kier a hasi hopi kos ainda). Nos lo sinti su falta hopi

Margreth
Patricia en Ren
Kyle en Sanne
Heather en Patriek
Lorraine en Peter

Akto di despedida ta tuma lugá djarason 15 mart di 1' or pa 3.30 na misa la Birgen di Coromoto Kaya Korona 126, Antriol.

Kremashon ta tuma lugá den seno familiar. Na lugá di flor Jan ta preferá un donashon na "VOEDSELBANK BONAIRE". Tin un buzón disponible na misa pa hasi donashon òf por hasi donashon dirèkt na: Johannes C. Kloos e/o Margaretha Kloos-Mulder MCB 10272701

Dag jij

Onverwachts is overleden mijn echtgenoot, vader en opa,

Johannes 'Jan' C. Kloos

Officier in de Orde van Oranje Nassau

Schiedam Bonaire

*03 december 1939 † 07 maart 2023

Jan was nog niet klaar met leven en zat nog vol toekomstplannen. We zullen hem enorm missen.

Margreth
Patricia en Ren
Kyle en Sanne
Heather en Patriek
Lorraine en Peter



De condoleance en gebedsdienst zullen plaatsvinden op woensdag 15 maart 2023 tussen 13.00 uur en 15.30 uur in La Birgen di Coromoto kerk, Kaya Korona 126, Antriol. Aansluitend zal de crematie in besloten kring plaatsvinden.

Op een later tijdstip wordt in Nederland nog een afscheid georganiseerd.

Jan wilde geen bloemen maar eventueel een donatie aan de voedselbank Bonaire, die hij een warm hart toedroeg. Dit kan ter plekke tijdens de uitvaart in een box, of via: Mw M.O.F Kloos e/o Hr J.C Kloos NL37ING0000272215

Pa info i komunikado den

Extra/BONERIANO

Redakshon: extrabon@gmail.com

Aviso mail: avisobon@gmail.com

Respektivamente di Kòrsou i Aruba

Charles do Rego i Astrid Muller den Herensia

KRALENDIJK – E programanan Herensia di e siman aki ta konta ku un invitado di Kòrsou i unu di Aruba, respektivamente Charles do Rego i Astrid Muller. Ekiponan di Herensia a papia ku ámbos persona, ku den e dos programanan aki ta konta di nan bida i karera.

Charles do Rego tin riba 80 aña di edat ku un kare-



ra impreshonante tras di lomba. E tabata dosente na skolnan avansá na Kòrsou. Despues pa añanan largu e tabata hefe di Kranshi, Ofisina di Poblashon i Registro Sivil. Den e kalidat aki el a supervisá diferente elekshon.

Bòi Antoin a papia ku Do Rego tokante su bida i karera, tambe di un buki ku el a skirbi di portuguesnan ku a bin traha na Kòrsou. Mayoria a bini for di Madeira.

Na Aruba Ludovico Nicolaas a papia ku Astrid Muller, un desendiente boneriano bibá na Aruba. Astrid su raisnan ta den e bario Nort di Saliña, meskos ku e presentadó, ku amor a nase for di mayornan boneriano ku a bai Aruba den pasado.



Astrid Muller a logra posishon haltu den sektor di hóreka na Aruba, despues di estudionan realisá na Merka.

E programa ku Charles do Rego ta kuminsá pasa djáron mèrdia pa 12'or na Bonaire.tv. E ta ripití durante tres dia na vários orario. Esun di Astrid Muller ta bai den aire pa promé biá djasabra pa 12'or, tambe ku ritishon durante tres dia.

KPCN reforsá ku 15 agente polisial nobo

KRALENDIJK -- Riba djabièrnè 10 di mart, durante seremonia di entrega di diploma e agentenan polisial nobo di Kuerpo Polisial Hulanda Karibense ofisialmente a terminá nan estudio di polis.

Durante e seremonia hefe di KPCN, Sr. Alwyn Braaf, hefe di tim pa e área di Karibe di e akademia di polis, Sr. Rob Appelhof, kordinadó di estudio pa

KPCN, sr. Lionel Vrutaal, Fiskal Mayó, Sr. Walter Kupers, i Gezaghèber Interino Nolly Oleana a dirigí palabra na e studiantenan den presensia di famia i amigunan.

Despues di e diskurso nan, Sr. Braaf i Sr. Appelhof a entregá diploma i 'epaulet' nobo na e agentenan ku a finalisá nan estudio. Despues a klousurá e seremonia ofisial ku un lunch

pa tur presente i e agentenan nobo a haña oportunidat pa selebrá e gran logro.



F
P



Bon siman di elekshon, vota bon, vota konsiente i Dios huntu ku esun ku bo a depositá bo voto riba dje, lo obra na bienestar di e isla kaminda bo ta biba. Manera ta bisa, “nog een nachtje slapen”, anto bo mester ta kla pa pone bo voto.

Nos tur ta liber pa disidí sea ta vota, pa ken ta vota òf no ta vota. Ta den kada hende su man si e ta vota i niun hende por bis'é algu. Bo ta liber pa vota i keda sin bai vota.

Mirando kuantu partido i kandidato tin riba e listanan, mi ta kere mester tin maske ta un persona ku bo ta kere un poko den dje, pa bo depositá bo voto mañan Dios ke. No mira kos, no mira loke bo por pidi òf haña serka un polítiko. Mi sa ku e tentashon ei ta grandi. Ken ku haña algu, anto pió si e ta den nesesi-dat, ta keda sin tuma esaki. Pero kisas bo por hasi manera un polítiko a bisa: “Keda ku bo partido, bisti flanèl i kampaña ku nan, pero depositá bo voto dia 15 di mart serka nos.”

Wèl ta abo so sa. Mi ta kere e lo ta sosodé tambe. Momentu ku un persona depositá su voto, solamente e sa pa ken el a hasié. Si e ta ku koló A i vota pa partido koló Z, niun hende ta bai sa.

Pero mi ta kere biba ku realidat ta mihó. Bo no mester mustra kua partido bo ta. Asina mi ta hasié. Pero ora mi drenta den e hòki skuritu ei, mi ta hasié pa esun ku mi sa ku hendenan kapas pa hasi un bon gobernashon. No spesífikamente na mi favor. Si nan hasié bon pa Boneiru, outomátikamente mi ta sali benefisioso for di dje. Ta meskos si mi kontribuí na un partido ku no ta bai hasi kos bon pa e isla, tantu e komo ami i abo ta bai keda perhudiká.

Despues ku bo lesa e artíkulo aki, a sobra poko tempu pa pensa. Pero si bo no a tuma desishon ainda, hasi esfuerso pa bo ta bon informá di tur i skohe pa e mihó. No warda te na momentu ku drenta den e hòki skur pa tuma desishon!

PROYEKTO BÒIKOTIÁ

KRALENDIJK- Colonial Builders B.V ta tilda diputado James Kroon di a bòikotiá e proyekto di bibi-enda na Kaya Sonmontuno, djis banda di Fundashon Kuido pa Personanan Desabilitá (FKPD).

Direktor di e kompania, Denis Solana a manda un artíkulo basta amplio pa prensa splikando loke segun e a tuma lugá. Solano

ta bisa ku el a risibí e notifikashon ku Kroon a kita e terenonan ku gobièrnu a entregá na Colonial Builders B.V. pa ehekutá e proyekto. Ta konosí ku e kompania a konstruí 3 kas. “Tres kas ku awe tur ta vandalisá”, el a agregá. E kompania a stòp di ehekutá e proyekto te na momento ku Kroon sali for di gobernashon.

Mester remarká ku

BONERIANO a trata na drenta den kontakto ku diputado Kroon pero te ku publikashon di e artíkulo aki nos no a risibí un reashon.

Preshon i menasa

Un punto basta alarman- te ta e deklarashon di Solano ku vários persona a trata na pone preshon riba dje. “Nos a stòp e fase di konstrukshon, presisamente debí na e echo, ku Kroon a bòikotiá e proyekto durante e proseso di konstrukshon di e 3 kas nan. Inkluso nos a risibí bishitá di vários amstat di diputado Kroon, durante e fase di konstrukshon, ku e proposishon, pa Colonial Builders B.V bende nan e proyekto”, el a sigui splika.

E ta para ‘riba ku asta ámtenar a aserk’é. “Mi a wòrdu aserka na vários okashon dor di un trahadó ku tabata forma parti di e kartera gubernamental di Diputado Kroon, pa nos regalá sèn. Nos a nenga esaki rotundamente. Nos ta asumí, ku esaki tabata un di e faktor nan mas fundamental, ku a pone ku nos no por a desaroyá e proyekto konkretamente.”

“Tambe nos a enfatisá, ku e úniko opstákulo, pa nos sigui ku e proyekto aki, tabata e komo diputado di infrastrukutura. Kroon tabata sa ku vários persona

a aserka nos ku e deseo di kumpra e proyekto. Nan tabata menasa nos konstantemente, pa nos bende e proyekto na un preis sumamente abou, pa asina nan por rebendé esaki na un preis mas haltu. E personanan aki, no tabata masha kontentu ku e preis ku nos a stipulá pa bende e kas nan, na komunidad Boneriano, pa asina aliviá e kosto di bibienda riba Boneiru”, el a agregá.

Atvertensia

Solano ta bisa ku últimamente e situashon a ripití. “Un amigu di Kroon, Kabara a aserká Rafael Santana, pa asina bende e proyekto na su persona i el a enfatisá, ku gobièrnu di Bonaire lo a manda un karta ku nunca mi a risibí. Ku ta papia tokante e límite ku gobièrnu di Bonaire ta establese, pa nos finalisá e proyekto.”

E ta atvertí e diputado. “Si Kroon, kontinuá ku su robo, nos lo tuma paso nan legal kontra e personalmente i Gobièrnu di Boneiru pa tur e gastu nan i invershon ku a wòrdu hasi pa ku e futuro di e proyekto menshoná.

Nos lo komuniká ku Gezaghebber Rijna i Ministerio Públiko, pa asina tuma karta riba e asunto pa kualke trabou òf plan ku ta den proseso, netamente durante kampaña.



Outo bandoná den Kaya Venus

E outo aki tin lunanan pará bandoná den Kaya Venus na Belnem. Habitantenan di e kaya kier sa ta ken ta su doño. I ku si no tin niun instansia ku por tuma akshon.



Eli Deli Cafe B.V.

ta buska

- 1 Bakker 40 ora pa siman

-idioma: spano, ingles i papiamentu.

-min 3 aña di eksperensia, edat min 25 - max 35

Pa mas info yama telefon **795 4709**

Segun agrikultor Nolly Oleana:

Retonan ta grandi pero no imposibel

KRALENDIJK— “Ar-
gikultornan tin reto grandi,
pero no imposibel, nan di-
lanti.” Nolly Oleana kende
ta agrikultor ta splika den e
programa **AKTUALIDAT**
entre otro riba retonan ku
e agrikultor lokal ta hañ’é
konfrontá kuné. Segun Ole-
ana pa kada un di e retonan
aki sinembargo tin solu-
shon.

Awa

Oleana ta referí na e dos

retonan mas grandi di un
agrikultor, ku ta awa i tera.
E ta splika ku awa ta un di
e elementonan esensial pa
un mata/palu por krese. Si
un agrikultor skohe pa uza
awa di ‘kranchi’ esaki ta
kosta mas i konsekuent-
emente ta kobra e konsum-
idó esaki tambe.

Oleana: “Un meter
kúbiko di awa ta algu mas
ku 4 dòler. Awa di dam i
pos ta pòrnada. Pa loke ta

di kloaka esaki ta 1,50 pa
m3, ku ta mas barata ku di
kranchi.”

Den su totalidat, segun
Oleana, Boneiru ta risibí
gran kantidat di awa. Kisas
no den un solo biá, pero si
midi i konta e kantidat ku ta
kai kada bes, esaki ta aku-
mulá un gran kantidat.

Loke Boneiru ta haña na
áwaseru ta yama yobidanan
torensial. Esaki ta nifiká ku

den un korto tempu bastan-
te awa ta kai. E agrikultor
mas aleu ta duna di konosé
ku fásilmente por tin awa di
yobe henter aña. “Si strate-
gikamente tin dam òf siste-
ma di fangu awa manera
baki di awa, por hasi hopi.
Na Boneiru ta kai alred-
edor di 400 mililiter di awa.
Esaki kalkulá riba henter e
superfisie di nos isla. Por
konklui, mirando esaki ku
ta basta awa ta kai i ku por
warda.”

Tera

Otro reto ku Oleana ta
mensioná ta tera. Boneiru
su tera ta relativamente
duru. Esei ta pone ku mes-
ter trata e tera promé ku
planta. “Kompará ku por
ehèmpel Merka, nos tera no
ta apsorbé awa. Pa e awa
penetrá den tera, e mester
keda para algun dia i ta sak
lentamente. Pa e tera por
apsorbé e awa, mester hasi

algu kuné.”

Boneiru konosé dife-
rente tipo di tera/tereno.
Greis kòrá i bèrdè ta esnan
mas usual. E ta splika ku
por sefta e greis i hasi e tera
fini. Esaki sinembargo no
ta fin di e proseso. “Ainda e
tera no ta den kondishon di
apsorbé e awa. E siguiente
paso ta bira di agregá ele-
mentonan órganiko. Agregá
glas ta un opshon, pero tin
rísiko mará na esaki. Otro
elementonan ku por agregá
ta entre otro karton, blachi
i mata. E elementonan aki
ta sòru pa e tera haña porio.
Konsekuentemente esaki ta
sòru pa e tera apsorbé awa
pero tambe oksígeno.”

Ora yega na e punto aki
ta bai papia riba e parti mas
importante ku mayoria hen-
de ta lubidá. Ta trata aki di
e parti di alimentá e tera. Ta
loke ta yama kompòst. Si
no alimentá e tera, difísil-
mente e por produ sí.



Dam na puntonan stratégiko pa wanta awa ku por usa den agrikultura



Programanan di Bonaire.tv

TELBO kanal 70

Flamingo TV kanal 23

Djammers 14 mart 2023

12.00 Herensia Korsou:

13.00 Aki Bonaire:

14.30 Herensia Korsou:

16.00 Aktualidat:

17.00 Programa Politiko:

18.00 Herensia Korsou:

19.00 Programa Politiko:

20.00 Aktualidat:

21.00 Programa Politiko:

22.00 MNB:

23.30 Puerto Latino:

Saida Hernandez-Augustina

Classical Music Board Benefi
etconcert 2019

Gilbert (Boy) Wout

Robby Beukenboom

MPB ta Informa Episodio 21

Carl(os) Smith

MPB

Rogder Gijsbertha

MPB ta Informa Episodio 20

Jan Kloos

Luis Zárraga

Tur mèrdia 12’or ta kuminsá un programashon nobo di 4 ora.
E programashon aki ta ripití pa 24:00.

UN YAMADA IMPERATIVO

“Te ora nos tur yega na e unidat di fe i di e konosementu di
e Yu di Dios, na bira un hòmer madurá, na e midí di e esta-
tura di e plenitut di Cristo.” Efesionan 4:13(BS)

Ora un bebi nase, su mayornan ta spera ku lo e sigui krese
gradualmente. Nan lo pèrkurá pa duna e kriatura tur su ali-
mentashon nesesario pa asina por mira e resultado deseá.
Meskos Dios tambe, ta spera pa Su yunan krese spiritual-
mente segun tempu ta pasa.

Apòstel Pedro ta manda nos pa anhelá manera mucha chikí
na e lechi puru di e Palabra pa nos por krese kuné (1 Pedro
2:2). Hesus mes ta bisa nos den Juan 15 pa nos permanesé
den djE i asina duna hopi fruta, pasobra sin djE nos no por
hasi nada, sin djE nos lo no por krese spiritualmente.

2 Pedro 3:18 ta duna nos e mandato pa krese den gracia
i konosementu di nos Señor Hesukristu. Kresementu spiri-
tual ta un mandamentu di Dios, e no ta un opshon. Si nos
traha riba nos kresementu spiritual Dios por usa nos na un
manera mas efektivu i kumpli Su propósitonan den nos bida.
Señor a duna nos e ingredientenan nesesario pa por krese:
lesa, studia i memorisá Su Palabra, pero riba tur kos, obe-
desé Su mandamentunan.

Kon bo ta mira bo bida? Bo ta bon alimentá den bo bida
piadoso? Si ta sí, sigui asina, pero si bo ta sufri di “anemia
spiritual”, disidí awe mes di no keda manera un bebi den
kosnan di Señor sino traha duru pa bira un kristian madu-
rá, na e midí di e estatura di e plenitut di Kristu (Efesionan
4:13).

Kresementu spiritual ta un mandamentu di Dios, e no ta un
opshon.

Valerie Balootje-Hooi

Produkshon PGM

NA KAMINDA PA ELEKSHON

Konteo voto diferente

KRALENDIJK — “Riba 15 di mart ta hasi konteo preliminar pa partido i siguiente dia ta konte voto personal.” Asina gezaghèber Edison Rijna a bisa durante e programa Gobièrnu ta informá. Pues e elekshon aki e konteo di voto lo bai na un manera diferente.

Gezaghebber Rijna su ròl den elekshon benidero ta di organisá un elekshon responsabel pa Boneiru. E ta hasi esaki konhuntamente ku Konseho Elektoral Supremo. Banda di Konseho Elektoral Supremo, e aña aki tin un organisashon di

Hulanda ku tambe ta yuda den organisashon di elekshon.

Hulanda su partisipashon na elekshon ta riba un base hurídiko. Debí ku Boneiru ta kai bou di ‘kieswet’ esaki ta pone ku Hulanda tambe ta forma parti di nos elekshon. E tin di aber ku e lei ku ta regla tur loke ta REGARDÁ elekshon. Hulanda ta duna tambe sosten i konseho riba ‘kiesraad’. Esaki ta e konseho na Hulanda ku ta atendé tur asunto di elekshon den Reino. Promé ku elekshon gezaghèber ta reuní ku entre otro Konseho Ele-

ktoral Supremo. Riba dia di elekshon gezaghèber huntu ku Konseho Supremo Elektoral ta riba pia for di 7’or. Esaki ta ora ku urnanan ta habri.

Pasangran ta e punto sentral unda tur loke ta material i artikulonan nesasario pa elekshon ta ubiká. Tambe tin oportunidat na sierto orario ku prensa por aserka gezaghebber pa hasi pregunta.

Pa 9’or di anochi tur urna ta sera. Despues di esaki ta kuminsá konte voto. Riba 15 di mart ta hasi konteo preliminar pa partido. Esaki ta nifiká ku ta konte voto pa

sa kua partido a sali ganadó. Riba 16 di mart ta konte votonan personal. Motibu di esaki ta pa evitá ku konteo ta bai dura muchu largu i tambe e rísiko pa kometé fayó durante konteo. Segun lei un siman despues, pues dia 23 di mart, ta ratifiká e resultado komo definitivo. Esaki ta un seshon formal unda Konseho Elektoral Supremo ta bini huntu i ta ratifiká e resultado. E ta un seshon públiko unda por trese remarke òf reklamo dilanti. Unabes ku sera e seshon aki resultado di elekshon ta definitivo.

Elekshon di 15 mart ta pa

skohe tantu representashon den konseho insular Boneiru i tambe ‘kiescollege’. E kolegio ku despues ta bai resultá den kolegio ku ta bai skohe miembronan di Eerste Kamer na Hulanda ku indirektamente ta tuma desishonnan pa Boneiru. Den práktika esaki ta nifiká ku ta bai tin 2 lista. Un ku partidonan polítiko di Boneiru i e otro pa skohe e kolegio.

Derecho di voto ta un derecho sagrado den tur demokrasia rònt mundu. Gezaghèber ta pidi tur siudadano pa hasi uzo di nan derechi di voto i pa bai vota.

Mañan ta despedí di e kandidato di MPB

Votonan depositá pa Jan Kloos ta bálido

KRALENDIJK — Votonan ku keda depositá mañan djáron, 15 di mart, riba kandidato di MPB Jan Kloos, lo ta bálido. E votonan ta konte pa e partido aki. Jan Kloos a fayeres inesperá siman pasá den su kas na Nikiboko, probablemente di un ataka di kurason. Pa kolmo mañan, riba dia di elekshon, ta despedí di dje.

Jan Kloos ta un lider klave di MPB. Den elekshon anterior tambe e tabata kandidato riba lista di MPB. Pa e elekshon aki e ta postulá na nr. 34. E tin

hopi aña bibá na Boneiru, na unda el a hasi hopi trabou boluntario.

Den su promé añanan na Boneiru el a sòru pa hinka un kurso den otro, huntu ku Rob Sint Jago, pa prepará personanan interesá pa bira stürman di barkunan chikitu. Asina tin diferente boneriano ku a haña trabou riba toubot i barkunan chikí i mediano.

Mas aleu durante su bida Jan Kloos tabata hopi embolbí ku trabounan boluntario den komunidat, manera di Tene Boneiru Limpi.

BONERIANO a konsultá e lei di elekshon i a topa ku informashon ku ta musta ku un kandidato riba lista di un partido, despues ku Konseho Elektoral Supremo a stipulá e lista, fayeres, e ta keda elegibel. Su votonan den un situashon asina ta keda pa e partido.

E artíkulo di lei ta bisa tekstualmente: “Als een kandidaat overlijdt vóór de definitieve vaststelling van de kandidatenlijst, dan kan de partij eventueel verzoecken om de kandidaat van de lijst te halen. Hiervoor moet

de partij bij inlevering van de kandidatenlijst een uittreksel uit het register van overlijden of een afschrift van de akte van overlijden overhandigen. Het centraal stembureau schraapt de kandidaat dan van de lijst.”

Jan Kloos a fayeres

despues ku a stipulá e lista di kandidato di MPB.

Pues segun lei no por kita su nòmber mas for di e lista aki. Pero e votonan depositá tras di su nòmber ta totalmente bálido i ta bai pa MPB.



Aljano Emerenciana i su lidernan nan na sede



NA KAMINDA PA ELEKSHON

Aktivitat na Sede Demokrat na Antriol



Pa evitá tardansa

Vota tempran

KRALENDIJK -- Djárasen 15 di mart persananan ku derecho di voto ta bai vota pa elekshon di Konseho Insular i den kaso ku nan tin derecho di voto pa esaki, nan ta bai vota pa Kolegio Elektoral tambe. Ta hasi un súprika pa bai vota tempran pa evitá ku mas lat ta bira drùk.

Por vota for di mitar di ocho di mainta te 9'or di anochi. Pa motibu ku ta spera ku ta bai bira hopi drùk na e urnanan elektoral, ta pidi pa bai vota mas tantu posibel durante dia.

Tambe Entidat Públiko Boneiru, via Diálogo Sentral, a supliká dunadónan di trabou pa duna nan empleadonan oportunidat pa bai vota durante dia. Por vota na kualke di e urnanan elektoral. En total tin 12 sitio pa vota na Boneiru i e votadó mes por disidí unda e ta bai vota.

Urna

1. Jong Bonaire - Kaya Libertador Simon Bolívar.
2. Sentro di Bario Tera Kòrá - Kaya Monseigneur Niewindt.

3. Kolegio Kristu Bon Wardador - Kaya Avelino Cecilia.

4. Sentro di Bario Niki-boko - Kaya Pos di Amor.

5. Sentro di Bario Amboina - Amboina.

6. Sala di Deporte Adventista - Kaya Ramona 8.

7. Kompleho Deportivo George Nicolaas - Kaya Amsterdam.

8. Sentro di Bario Nort Saliña - Kaya Cacique 9.

9. Sociedad San Antonio de Padua - Kaya Rincon 66.

10. Tia Sani - Kaya

- Encarnacion Sint Jago.

11. Urna elektoral mobil - diferente lokalidat pa mas informashon subi www.boneirutavota.com.

12. Edifisio na Aeropuerto Flamingo, banda di Brantwer - Bulevar EEG.

Kiko tin ku bai kuné pa vota

No lubidá di bai ku karchi di vota i prueba di identifikashon ora ta bai vota. Si falta un di e dos dokumentunan akí, no por vota.

Bo mes no por bai vota,

por ehèmpel pasobra bo ta malu, òf pasobra temporalmente bo ta den eksterior, e ora ei bo por pidi un otro votadó pa vota pa bo. Esaki ta yama apoderá un hende. Bo ta apoderá un hende solamente ora bo mes di bèrdat no por bai vota. Bo por haña tur informashon tokante apoderashon riba wèpsait.

Tur loke bo mester sa tokante e elekshonnan akí i asuntunan manera ki dia, kon i di kon mester vota bo ta haña riba wèpsait <https://www.boneirutavota.com/>

NA KAMINDA PA ELEKSHON

Análisis polítiko pa elekshon 2023

Wimpy Cecilia kandidato ku mas peso pa elekshon

Pa: Yonchi Dortalina KRALENDIJK --

Analizando e kandidatonan ku mas eksperensia i di mas peso polítiko gubernamental pa e elekshon di 15 di mart, Yonchi Dortalina ta yega na sinku kandidato i un persona ku ta brinda perspektiva pa futuro polítiko di Boneiru. Wimpy Cecilia ta sali na kabes, sigui pa Clark Abraham, Daisy Coffie, Jona Chirino-Felida i Hennyson Thielman.

Dortalina ta skohe Cecilia pa motibu di su kapasidat intelektual di a risibí su título di maestro den sien-sia pa despues doktorá den sensia di bon gobernashon. E ta dominá e idiomaan papiamentu, hulandes, ingles i spañó, ku perfekshon. Esaki tantu skirbí komo verbal. Su eksperensia gubernamental di a sirbi komo sekretario athunto i griffier pa Boneiru, ta dun'é un punto riba sobrá kandidatonan.

Cecilia ta salí for un kas polítiko i ta yu di e legendario Abechi Cecilia, un di e baluartenan di Partido Demokrat. El a militá dos biá riba lista di Partido Demokrat den pasado i a sali viktوريوسo den e elekshonnan ei. Dor di a traha komo sekretario di portafolio pa diputadonan, e tin kono-sementu amplio di e embergadura di trabou di un diputado. Trahando komo sekretario interino, e tin tur saber di e aparato gubernamental.

Cecilia ta un ámtenar di

trayectoria largu, pues konosé e aparato públiko den su totalidat.

Pa hopi aña largu el a traha komo griffier. Ku e eksperensia amplio akí, e ta dominá e aria di Konseho Insular mas ku tur otro kandidato. Tambe el a traha den hopi grupo di trabou pa gobièrnu kual entre otro pa asuntunan di struktura estatal i kambionan di lei. Aktualmente e ta den e grupo di trabou kual ta enserá kambio di WolBes i FinBes.

Cecilia ta un hende di pueblo ku no ta kana bro-ma, ni hasi grandi. E ta un persona trahadó, humilde pero skèrpi, kual ta kumpli ku tur e karakteristikanan boneriano ku por sirbi pa traha na un manera serio na bienestar di e pueblo akí. E puntonan aki ta pone Cecilia komo e kandidato ku mas eksperensia i peso pa e elekshon binidero.

Clark Abraham

Clark Abraham ta sigui na e segundo lugá pa e trabounan ku el a hasi den oposishon e último periodo di gobernashon. E ta e polítiko ku mas a sobresalí den e último 4 añanan komo miembro di Konseho Insular.

Abraham no ta deskonosí den gobernashon di nos isla. Den su periodo komo gobernante, e no a gosa di

simpatia di ámtenarnan pa su forma diktatorial di atendé asuntunan di gobernashon. Pa e por desaroyá su mes komo gobernante, e mester siña tende, sigui konseho di esnan ku mas eksperensia i no sea orguyoso di mas.

Daisy Coffie

Na di tres lugá ta sigui Daisy Coffie kende tambe tabata hopi aktivo den Konseho Insular den e último 4 añanan.

En prinsipio ta Abraham i Coffie so a funshoná aktivamente den Konseho Insular e último 4 añanan. Nan a debatí na un nivel aseptabel i a kontribuí na nan forma den gobernashon di nos isla.

Coffie ta kapasidat i ta priminti hopi pa futuro. Pero tempu lo mester mustra sí e lo por ta un bon mandatario



pa nos isla. Tin diferensia grandi entre un bon polítiko i un bon mandatario. E tambe mester siña skucha i sigui konseho di esnan ku mas eksperensia kuné.

Un kos tantu Abraham i Coffie mester siña hasi, ta di no buska guerra ku prensa. Nan mester respetá prinsipionan di política, esta respetá prensa pa prensa por respetá nan. Mester tin rèspèt pa pueblo, pa pueblo tambe por respetá nan. No mester lubidá nunca ku prensa ta pueblo i pueblo ta prensa. Meskos ku pueblo por ekspresá su mes abiertamente sin miedu, prensa

tin e derecho sagrado di skirbi loke ku e ta kere ku e tin ku skirbi pa informá pueblo.

Jona Felida

Na di kuater lugá ta Jona Chirino-Felida, kende no ta un deskonosí den e área polítiko boneriano. Komo un trahadó sosial e por ta un instrumento importante



pa yuda den kombatimentu di pobresa. E ta e supstituto korekto pa Nina den Heyer, kende a retirá for di política. Un persona ku por kubri e área sosial kual ta esensial pa Boneiru por logra mas benefisio sosial di Hulanda.

Felida su kapasitashon, eksperensia komo diputado i polítiko, pero tambe su eksperensia den bario komo trahadó sosial, ta dun'é un lugá spesial riba nos isla. E lo por ta un yabi spesial pa habri porta di esnan ménos pudiente i yuda esnan di ménos rekursu.

Hennyson Thielman

Na di sinku lugá tin e hóben Diputado Hennyson Thielman. Polítikamente el a mustra kon el a surpasá su lider polítiko i te asta nombrá tambe pa su partido komo e lider nobo pa MPB.



Pa por sigui desaroyá komo diputado, e tin algun punto di mehorashon ku meresé atenshon agudo.

Diputado Thielman no por sigui hasi kambio drástiko sin tene kuenta ku konsekuensia ku e kambionan akí ta trese kuné pa pueblo. Un ehèmpel di mal maneho ta e forma kon den forma unilateral a kue e kantidat di barku krusero ku ta bini Boneiru i baha esaki ku 50%. Esaki tin taksistanan i komersiantenan hopi rabiá.

Asina por menshoná un kantidat di desishonnan diakrónico ku Thielman a tuma, sin ku promé a hasi un análisis di riesgonan ku esakinan ta trese kuné. Medidanan manera entre otro para e ekonomia di Boneiru no a keda apresia pa e mundu ekonómiko komersial.

Thielman komo hóben tin e abilidad di por surpasá su defisiensianan i sí e sigui konseho di esnan ku mas eksperensia, e lo por resultá algu positivo pa Boneiru.

Perspektiva pa futuro

E perspektiva pa futuro ta Dudley Wederfoort. Un persona kapasidat i ku abilidadnan pa por yega hopi leu. E ta un vishonario ku ta pensa pa futuro.

Dortalina ta spera ku su partido lo duna Wederfoort espasio pa e por sigui krese polítikamente i personalmente komo un di e posibel lidernan di Boneiru pa futuro.



NA KAMINDA PA ELEKSHON

Nunu ta kòrá i ku Rolanda!

KRALENDIJK—Kosido Nunu Raphaela ta na Boneiru pa algun dia i el a konta un reportero di BONERIANO djadumingu pasá anochi na sede di Demokrat, su bishita ta pa e sostené Rolanda Hellburg-Makaai. "Mi ta na Boneiru, pa sostené Rolanda Hellburg Makaai." Rolanda ta tanta di Nunu.

Nunu: "Despues ku Rolanda, a hasi un bon trabou

komo diputado, mi tin un kompromiso ku mi mes, pa sostené.

Laga nos no lubidá, ya ta 7 aña ku Rolanda, a para firme komo diputado i a logra entre otro Parke Lalan Clarinda a drecha Kaya Pos di Amor, tambe el a logra hiba awa na Nieuw Amsterdam. El a pèrkurá pa pone drèmpel na kaya Macario Sint Jago."

"Rolanda a goberná bon

i a hasi kos pa Bario Nikiboko. Ta bisto ku el a hasi esfuerso pa logra diferente kos. P'esei, ami Nunu, ta sosteniendo Rolanda, pa asina e sigui traha pa e barionan di Bonaire. Ekonomia na Boneiru ta den desaro, pero nos barionan, ta bayendo atras." Nunu su mensahe tabata kla, pa specialmente hendenan di Nikiboko, sostené Rolanda dia 15 di mart.



M-21 Den Rincon

Djadumingu pasá anochi kayanan di Boneiru tabata yená ku hende, bandera i outo. Esaki tabata na Playa i Rincon. Tur partido polítiko, huntu ku simpatisantenan, tabata di un òf otro manera, hasiendo algu, relashoná ku elekshon di dia 15 di mart.



Sirbidó di misa a bishitá Cargill

KRALENDIJK -- Sirbidónan di misa di Misa di Coromoto a bishitá Cargill djasabra bou di guia di Pastor Marc Hooijschuur i lidernan Liduska Winklaar i Selimah Agostien.

E grupo di sirbidó di misa ta konsistí di un total di 31 sirbidó, ku ta sirbi misa na Misa di Coromoto na Antriol.

Ta hasi diferente aktividat ku e sirbidónan, entre otro aktividatnan plasentero, pero tambe edukativo. E biá akí a toka turno pa un bishita na Cargill.

Daniel Deanda a duna e grupo informashon hopi balioso na e sirbidónan i tambe mostra kon e proseso di salu ta tuma luga aki na Boneiru.



Hopi ánimo pa treinen sosten di presupuesto

KRALENDIJK -- Komo parti di asistensia tékniko pa asistí Entidat Públiko Boneiru ku ehkushon di e programa di sosten presupuestario di Union Oropéo pa maneho di hubentut den e siman di 27 di febrüari pa 3 di mart, dos tayer a tuma lugá.

Gezaghebber Edison Rijna, komo Territorial Authorized Officer di Boneiru pa Union Oropéo, a habri e promé dia di tayer i a deseá tur hende hopi ék-sito i plaser.

Sosten presupuestario di Union Oropéo ta un forma di asistensia kaminda ta pone fondo disponibel ku ta keda transferí direktamente pa presupuesto di gobièrnu komo un kontribushon na realisashon

di metanan di maneho. E gobièrnu ku ta risibí e sosten mes ta formulá e metanan akí, bou di kondishon ku e pais ku ta risibí e sosten ta realisá sufisiente progreso den ehkushon di e maneho en kestion.

E promé programa di sosten presupuestario di Union Oropéo pa Boneiru ta relashoná ku sosten pa maneho di hubentut i ta un suma di en total 3,6 mion euro, di kua a risibí 2,2 mion euro na aña 2020. Lo risibí e sobrá 1,4 mion euro na fin di aña 2023, basta Boneiru realisá sufisiente progreso ku implementashon di e maneho di hubentut.

E di dos programa di sosten presupuestario di Union Oropéo pa Boneiru,

ta den preparashon i esaki ta relashoná ku maneho riba tereno di purifikashon di awa sushi.

Kolaborashon ekilibrá

Kristina Sevastou, representante di e delegashon di Union Oropéo ku responsabilidadat pa Boneiru, a bisa: "Boneiru i Union Oropéo konosé un relashon largu ku otro. Sos-

ten presupuestario ta hasi e sosten di Union Oropéo parti di e presupuesto di Boneiru i ku esaki parti di Boneiru su propio kapasidat di ehkushon i kontròl nan demokrátiko. Esaki ta un señal di un kolaborashon i asosashon ekilibrá."

Durante e tayernan a introdusí tambe e portal nobo di internèt ku informashon

tokante tur fondo i ayudo di Union Oropéo ku ta disponibel, pa kua Boneiru por bini na remarke. Esaki ta aksesibel via <https://bonairegov.com/idb>.

Boneiru ta e promé den region ku tin un punto di informashon sentral ku ta aksesibel pa siudadano, empresario i gobièrnu.



Dediká na Crispina `Chèmi` Cicilia-Janga

Inskripshon Kanto Krioyo 2023

KRALENDIJK— Kanto Krioyo 2023 ta dediká na yùfrou Chèmi. Un total di 29 partisipante ta den kontienda.

Pa loke ta e parti hubenil esaki ta 10. Djadumingu 12 di mart na Geza Place den bario di Rincon, a tuma lugá inskripshon Kanto Krioyo 2023. BONERIANO a hiba un kombersashon ku Maikel Janga di Komishon Kanto Krioyo Rincon riba e inskripshon i tambe preparashonnan pa e evento.

Na inisio di mart e organisashon a tene un sondeo ku bandanan pa haña un bista kuantu partisipante lo por spera.

A konkluí ku posiblemente e kantidat lo por tabata 35. “Djadumingu sinembargo nos a yega na kantidat di 29 partisipante. Un dje motibunan ta ku un banda a kai afó i konsekuentemente e partisipantenan tambe.

Tabatin tambe partisipantenan di otro banda ku a kai afó.”

Apesar ku no a yega 30 partisipante, tòg e organisashon a opta pa bai 2 anochi preliminar di kanto krioyo. Mas aleu Janga ta splika ku último bes ku a organisá kanto krioyo tabata na 2019.

Tur kos tabata kla pa e festival na 2020, pero algun siman promé ku e evento, covid a bati na porta di Boneiru. Konsekuentemente, ku tur kos kla prepará i faltando algun dia, mester a kanselá tur kos.

Mas aleu Janga ta splika ku entretantu ya a hasi algun preparashon pa loke ta presentashon di bandanan. E ta indiká ku tin 6 banda ku ta aktivo henter aña i ku lógikamente e bandanan aki tin nan fanatikada.

“Pa evitá ku ora di tira lòt tur e bandanan aki ta kai riba mesun dia, a yega na e palabrashon ku ta repartí nan riba e dos dianan.

Pues 3 djárasen i 3 djaweps. Esaki ta pa e balansa keda pa ku e otro bandanan ménos aktivo henter aña.” Loke si nan mester hasi manera tur otro banda ta ranka number pa órden di aparishon. Dia 27 di mart ta saka e sekuensia den kua bandanan lo partisipá.

Festival Kanto Krioyo ta keda na mesun sitio, esta stadion Antonio Trenidad na Rincon. Komishon Kanto Krioyo ta den kombersashon ku diputado i Federashon Futbòl Boneriano (FFB) pa organisá e evento di tal manera ku futbòl i e festival ta separá for di otro. Anochi final pa adulto ta riba 1 di aprel, miéntas ku hubenil ta riba 2 di aprel.

Inskripshon Festival Kanto Krioyo 2023 - **GRANDI (preliminar)** - 29 / 30 Mart 2023

Kantante:	Titulo di Kansion:	Kompositor:	Agrupashon Musikal:
1 Andres Huntley Seraus	Union	Ubaldo Anthony / Wesley Sint Jago	Tutti Frutti
2 Reginald Dortalina	Dia di Rincon ta ken por ku mi	Reginald (Joonchi) Dortalina	Tutti Frutti
3 Wesley Sint Jago	Rincon ta mi tesoro, e ta mi klòmpi oro	Wesley Sint Jago	Tutti Frutti
4 Ray Doran	Laga e kosnan keda krioyo	Guillermo (Momo) Janga	Jom Krioyo
5 Etisienne Koffy	Selebrashon Dia di Rincon	Guillermo (Momo) Janga	Nel i su Grupo Krioyo
6 Nel Piar	Rinconero mi ta	Guillermo (Momo) Janga / Nel Piar	Nel i su Grupo Krioyo
7 D'Jar Vlijt	Rincon pa selebra	Johnny Vlijt	Jom Krioyo
8 Angelo Mercera	Rincon mi ta basha pa bo	Johnny Vlijt	Jom Krioyo
9 Urvin Frans	Ta tempu pa bai kunuku	Johnny Vlijt	
10 Johnny Vlijt	Rincon den Kabe'(s)	Johnny Vlijt	Foyan Boyz
11 Geraldine de la Court	Kuna di Kultura	Lendy Leito	Foyan Boyz
12 Gefely Vlijt	Pulmon di nos pueblo	Marlon Rombley	Foyan Boyz
13 Claudette van Arneman	Basha bin abou, basha bin Rincon	Maria C. van Arneman	Kunuku Boys
14 Josendy Thodé	Henky	Guillermo Janga / Goswin Bernabela	Jom Krioyo
15 Rayshantaly Coffie	Den kobá, e huki tra'i seru	Rubertico Balentien	FMK
16 Dayron Coffie	Ami ku bo	Jeanay Coffie	FMK
17 Leonarda Janga	Rincon su Zjilea	Norwin Coffie	Jom Krioyo
18 Sigmaira Mercera	Prueba	Salomon Anthony	Foyan Boyz
19 Jurien Ascencion	Rincon ta di fiesta (pa bo sa)	Jurien Ascencion	Jom Krioyo
20 Jonathan "Gogo" Martijn	Den Gobi simadan	Norwin Coffie / Gerald Girigorie	Ritmiko Timon
21 Cliftenjohn Martines	Rincon tey selebrá	Jonathan de Windt / Quinton Soleana	Ritmiko Timon
22 Francis (Sisi) Janga	Bos di Rincon	Francis Janga	Grupo Eso
23 Fredsel Pauletta	Rincon mas dushi ku Dubai	Fredsel Pauletta	Grupo Eso
24 Jurnick Clarendra	Den rondó	Rubertico Balentien	JC & Friends
25 Rainiger "Payo" Goeloe	Den kayente di mi kultura	Sendion Balentien / Jusliston "Kabuya" Janga	JC & Friends
26 Aimee Janga	Honor na mi bandera	Chendell Beaumont	JC & Friends
27 Sharlisse Thomas	Un ko'i Rincon	Tico Balentien	JC & Friends
28 Luis Moka	Kon mas mi por splika bo, Rincon?	Luis Moka	Palu Grandi
29 Rendert Janga	Homber di laman, shelu i tera, e strea	Rendert Janga	

Inskripshon Festival Kanto Krioyo 2023 - **HUBENIL** - 2 April 2023

Kantante:	Titulo di Kansion:	Kompositor:	Agrupashon Musikal:
1 Swenthely Mercera	Den Rincon	Wilson Frans	Jom Krioyo
2 Maycy Trenidad	Rincon di antes vs Rincon di awó	Guillermo (Momo) Janga	Jom Krioyo
3 Juliendra Janga	Esaki nan mi a heredá	Chendell Beaumont	Jom Krioyo
4 Juliandrick Janga	Jamami Much'I Rincon	Chendell Beaumont	Jom Krioyo
5 Janisla Offerman	Rincon den gloria	Rubertico Balentien	FMK
6 Franyellie Evertsz	Belua den Rincon	Sigfried Molina	Kunuku Boys
7 Zales Anthony	E tin su historia	Nataniel (Nati) Melaan	FMK
8 D'angé Sint Jago	Ankrá na mi kurason	Robert Felida / Kemuel Leito	JC & Friends
9 Dazhina Mansveld	Di mi grandi nan	Berti Komproe	JC & Friends
10 Raiza Wilsoe	Weg'i m'a róndu	Luis Moka	JC & Friends

Flur pa fever den 5 siman

KRALENDIJK—Djaluna mainta grupo di persona a presentá na Boka Onima, pa e firmamentu di dokumento, pa kuminsá ku trabounan pa e flur pa ponementu di fever. Timoteo Silberie, hefe di deportamentu di edukashon i bienestar, tabata e promé persona ku a papia na e sitio. El a bisa: “Nos ta pará awe na un gran dia. Simbólikamente ta bai krea fasilidat pa e deporte di pustamentu ku outo, motosaikel i otro vehikulonan. Awor despues di hopi a spera, awe ta bai kuminsá prepará pa traha e pista pa ponementu di fever. Ta gradisí tur e instansianan enbolbí, diputado James Kroon, kende a karga e proyekto.”

Diputado James Kroon

“Hende lo puntra, dikon nèt awe? Mi tin 8 luna ta traha riba e proyekto aki. Mi ta gradisí BC pa kontribuí pa e proyekto aki ta

kla pa awor por inisiá ku e trabounan. Danki na Din Bernabela i Gerald Silberie, kendenan a hasi hopi esfuerso pa e proyekto ta kla. No tabata fásil. Mester a tene kuenta ku hopi kos. P’esei no por a sigui ku e plan ku tabatin, pa krea e fasilidat na subi kolombia. Danki tambe na Fittipaldi i laurence ‘Louchi’ Cicilia, kendenan a keda pusha pa yega na e fasilidat pa e deporte di spit. Tambe mi ta mira algun di esnan ku a kuminsá den pasado ku e idea pa yega na pista pa dragrace, entre otro Henrique Winklaar. Hopi idea tabatin i a opta pa hasié via INDEBON. Pa un persona partikular atendé ku e proyekto aki, e sistema ku kosnan ta awendia, pèrmit i diferente otro kos ku mester tene kuenta kuné, e lo tabata imposibel. Aanleg vergunning ta kla pues trabou ta bai kuminsá. Pintura tabata hasí, pero no por presente

awor na e sitio, pero prensa ta hañ’e i por kompartí esaki ku pueblo. Algu ku mi a tende e dianan aki ta, ku a limpia e tereno pa pone molina di bientu, awe por mira ku ta di bèrdat, kiko ta bin na e sitio. Tur manera sierto hendenan ta purba pa kibra kos. Fondo tei, kompania ta konosí i tur kos ta na lugá pa trabou kuminsá. Despues di kada aktividat, pustamentu òf ponementu di fever, ya a atendé pa korektamente re-

sponsablemente, pa transportá tur vehíkulo pa nan kas. Tin fondo un banda pa e parti aki tambe.”

Martijn Zwiers di BWM, ku ta e kompania ku ta bai hasi e trabou, a bisa: “Nos ta bai ehekutá e bunita proyekto. Ta bai hasi e flur di asfalt, den un área será i pone vangreel den sierto área pa loke ta trata seguridat. E parti na e banda di laman, ta bira e sitio pa stashoná outo pa wak e

aktividat. Ta bai sigui rosa e mondi pa e parti pista di dragrace ku ta bin pega na loke ta bai konstruí awor. Mas o ménos 5 siman ta realisá e trabou.

Promé ku esei tin kosnan ku mester atendé pa por hasi e trabou, esta material i midimentu.”

Despues a sigui e parti di firmamentu i diputado Kroon, a subi mashin, pa kuminsá rosa e parti kaminada e pista di dragrace ta bin.



RODI

MARTES

#32

#HUNTU

"Huntu nos ta logra pa kada suidador tin aksesu na tur servisio ku gobièrnu tin pa ofresé."

MPB

Movimentu di Pueblo Boneriano

AMANCIO

BATTA

#33

#HUNTU

"Huntu nos ta hasi Boneiru konsiente di su kultura."

MPB

Movimentu di Pueblo Boneriano




Evento ‘BonAbyss2023’

KRALENDIJK -- Blue Classroom Freediving ta organisá e evento ‘BonAbyss2023’ na Boneiru, kaminda Alexey Molchanov ta presentá e intento di rekòrt mundial. E evento ta tuma lugá di 24 pa 29 di mart.

Pa kuminsá prepará, a pone un bum temporal en-

tre Plasa Resort i Te Amo Beach, den awa blou, ku pèrmit di STINAPA, Ofisina di Haf i TCB.

E bum akí ta pa sigurá e siguridat di e atletanan, u-suarionan di Parke Marino i ambiente marino. Mester ta èkstra kuidadoso banda di e área akí kuminsando 10 di mart pa 30 di mart.



EDITORIAL

No purba sera nos boka ku intimidashon!

Grandinan sa bisa ku den kuaresma diabel ta lòs. Ta parse ku grandinan tabatin rason, mirando loke ta pasando e dianan aki, ku un elekshon di Konseho Insular dilanti porta, tambe meimei di kuaresma. Yen kos ta pasando, sin ku nan ta bini den publisidat.

Ayera sinembargo a sosodé algu ku nos no ta laga bai den aire sin mas. Ta konserní akitut di e lider di Demokrat, Clark Abraham, ku aparentemente ta hopi molestiá pa kontenido di nos EDITORIAL di ayera den BONERIANO. E ke usa menasa i intimidashon pa pone nos rektifiká e opinion ku nos a etalá den e espasio aki, relashoná ku e asunto di supsidio di hür.

Den e dianan ku a transkurí BONERIANO a elaborá i profundisá den e materia di supsidio di hür. Nos reporteronan a sigui e reunion di Konseho Insular siman pasá, nos a sigui un konferensia di prensa di gobièrnu i Fundashon Cas Boneriano (FCB) djabièrnè último, nos a risibí i publiká un komunikado di prensa ku Demokrat mes a saka riba e tópiko. Despues di tur esaki nos yega na e komentario redakshonal di ayera, tras di kua nos ta keda pará 100%.

Clark Abraham den kurso di ayera a tuma kontakto ku miembronan di nos redakshon pa eksigí rektifikashon di e echo ku nos a pone ku el a gaña den un komunikado ku el a saka tokante e asunto aki. Nos ta basa nos opinion riba tur otro splikashon ku a bini dilanti e dianan ku a pasa tokante supsidio di hür.

Si Clark ta haña ku nos no tin rason, e por duna su banda di medaya un biá mas si e ta haña nesesario. Pero pa bai menasá i intimidá nos miembronan di redakshon, pasobra nos a ekspresá un opinion

tokante e asunto di supsidio di hür aki, ta hopi leu buská.

I esaki no ta e úniko kos ku a pasa últimamente. Rònt Boneiru tabata sirkulá pa dianan kaba rumor tokante asunto di droga i Clark Abraham. Nos no a krea e rumor, nos no a plama e rumor, sino a duné oportunidat pa reakshoná den un programa di televishon na un kanal ku ta kai bou di Bonaire Communication Services. El a desmentí, pero despues ta eksigí pa revelá nos fuente, loke ta e kos di mas ridíkulo ku un polítiko por hasi. I asta menasá ku e lo duna keho na polis i nan lo pone nos divulgá nos fuente. Mesora ku polis yega na nos porta pa pidi nos pa menshoná fuente, nos lo sòru pa miembronan di Tweede Kamer hasi pregunta na minister di hustisia di Hulanda.

No ta promé biá ku nos ta pasa den e kosnan aki ku e lider di Demokrat. Algun aña pasá, siendo den posishon di diputado, tambe el a purba ‘silensió’ nos pèn, asta ku asistensia di abogado. E tempu ei simplemente pasobra nos a ‘riská’ hasié pregunta tokante sierto publikashonnan riba media sosial.

Aktitut di Clark Abraham ta di lamentá. Ta un manera di proseder totalmente robes, ademas totalmente kontra e loke su tata (huntu ku nos!) a lucha p’e asina duru: LIBERTAT DI EKSPRESHON!

Nos ta sperando ansiosamente riba posibel pasonan legal ku Clark lo bai tuma. Laga e komprondé ún kos bon sí: BONERIANO no ta aseptá intimidashon, ni menasa, di ningun polítiko! Tampoko di Clark òf e dinastia polítiko di Abraham.

DUSHI TEMPU DI TELEVISHON

Ku e seri aki mi ke hiba boso den tempu. Mi ke rekordá huntu ku esnan ku a lanta den añanan sesenta i setenta televishon di e tempu aya. Televishon “pretu ku blanku”. Tambe pa laga e generashon despues sera konosí ku loke tabata dibertishon pa mucha, hóben i adultonan den dékadan sesenta i setenta riba nos isla. TeleCuraçao a drenta operashon dia 31 di yùli 1960.

The Little Rascals

‘Our Gang’, konosí tambe bou dje nòmber ‘The Little Rascals’, tabata un seri ku a pasa na televishon merikano i na TeleCuraçao den añanan sesenta. Originalmente a produsí e seri aki pa sine, den e periodo di

1922 te 1944. Na momentu ku televishon a kuminsá nan a aparésé tambe riba pantaya televisor. Na total a produsí 59 pelíkula kòrtiku.

Produtor di ‘The Little Rascals’ tabata Hal

Roach, mesun produktor di e pelíkulanan di ‘Laurel and Hardy’, konosí serka nos komo ‘De Dikke en de Dunne’.

Komportashon natural

E seri aki ta diseñá pa mostra muchanan ku ta komportá na un manera relativamente natural. Roach i e direktor original Robert F. McGowan a traha riba un seri ku ta trata na presentá un produkshon unda e muchanan ta aktua na nan manera, na lugá di imitá estilonan di akushon di adulto. Mas aleu e seri aki a kibra barera, portretando muchanan blanku i



pretu huntu, interaktuando komo igual. Esaki den un era ku tabatin segregashon rasial na Estádos Unídos. Tabatin hopi krítika sí riba e produktornan pa e forma kon nan a potretá e muchanan pretu frente esnan blanku.

E franchise di e seri a kuminsá na 1922 komo un seri di sine nan kòrtiku sin zonido ainda. E produkshonnan a kuminsá den studionan di Roach i distribuí pa Pathé Exchange, ku despues a pasa pa MGM na 1927.

The Little Rascals’ ta un grupo di mucha pober ku ta haña nan mes embolbí den hopi aventura, entre otro tambe hasi kos di baladadi.

Elenko

Di mes mucha ta krese bira adulto i mester kambia e elenko regularmente.

E aktornan mayoria bes tabata di e área di Los Angeles. E operashon pa rekrutá aktor pa e seri aki tabata sosodé kontinuamente.

A tèst míles di mucha durante e periodo di produkshon di ‘The Little Rascals’.



Algun di e aktornan ku a sobresalí atra-bes di añanan tabata: Norman Chaney (Chubby), Matthew Beard (Stymie), i Billie “Buckwheat” Thomas. Chaney a remplasá Joe Cobb, Beard remplasá Allen Hoskins (Farina), i Thomas remplasá Beard.



MONCHI & TONCHI

Bo a mira e Rinkonero ta hunga tòf riba motosaikel ei.

Awèl si, si e kita kai ta nèt. E ta na bèrdè kaba.



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Davienuska Janga
Velli Gijsbertha
Edson Pietersz
Ibi Piar (deporte)

Layout
Davienuska Janga
Maya Beaumont

Konsehero:
Bòl Antoin
786-6818
Aviso
avisobon@gmail.com

Min.Pres a risibí representante di Reino Bekkers

WILLEMSTAD – Promé Minister sr. Gilmar Pisas a risibí representante permanente di Reino pa Nashonnan na Genebra, Embahador sr. Paul Bekkers riba 6 di mart 2023.

Durante di e bishita di kortesia aki tabata presente sra. Audrey Goosen ku lo bira Hefe di Ekonomia i

Representate Permanente Adjunto pa e Organisashon Mundial di Komersio, Direktorado di Relashonnan Eksterior (DBB) di Kòrsou i e Komishon Permanente di Komersio Internashonal i Relashon Ekonómiko Eksterior. E kombersashon ku Embahador sr. Bekkers tabatin ku Promé Minister

sr. Pisas tabata un masha ameno i fruktífero, kaminando a toka diferente tema di interes. Entre e temanan ku a diskutí por menshoná

ta estado chikí insular den desaroyo (SIDS), Nashonnan Uní, derechi humano i Organisashon Mundial di Komersio.

Na final di e bishita Promé Minister sr. Pisas a gradisí Embahador Bekkers pa su bishita i a hasi entrega di un buki na dje.



Den kaso di apelashon

Huramentashon di hues kaso Ennia

WILLEMSTAD - Djaluna 13 di mart 2023, e siguiente huesnan a huramentá komo miembro adishonal di korte serka mr. M. J. De Kort, Presidente di Korte di Hustisia Komun, asisti pa sekretaria sra. Y. N. Pietersz. Sr. M. M. M. Tillema, kende ta tambe konsehero senior di Korte di

Apelashon di Amsterdam.

Sr. P. W. A. Van Geloven, konsehero senior di tribunal di hustisia di Hertogenbosch. Sr. H. I. Wattel, tambe konsehero senior na tribunal di hustisia Arnhem-Leeuwarden.

Sra. Tillema i Wattel i anteriormente tabata miembro di korte.

E tres huesnan aki ta spesifikamente enkargá ku e kaso Ennia, ku ta bai den apelashon e siman aki. Nan ta haña asistensia di un Griffier di Hulanda, sr. F. L. A. Straathof. Straathof a huramentá komo Griffier serka presidente di Korte Komun di Hustisia dia 24 di òktober 2022.

Detenshon relashoná ku maltrato

WILLEMSTAD -- Djabièrte 10 di mart den oranan di anochi, sentral di polis a dirigí un unidat polisial na Hòfi Monchi, pa un hòmbler sospechoso ku a maltratá su pareha i yu.

Na yegada di e unidat polisial a topa ku un dama ku a deklará na polis ku despues di un diskushon un ratu promé su pareha lo a maltrat'é i su yu ku un

kuchú.

Na un restaurant den e mesun área a bin topa ku e hòmbler sospechoso i a hasi detenshon. Ta trata di e sospechoso M.D.K., nasé na Kòrsou di 36 aña di edat..

A presentá e sospechoso dilanti un fiskal ouksiliar ku despues di interrogashon a ordená su enkarselamentu pendiente di mas investigashon.



ARUBA

Hobennan cu arma blanco of di candela ta un problema serio na Aruba

ORANJESTAD -- Aunke cu tur siman den Corte tin un caso y tal señala cuanto castigo tal haya pa simpel posesion di arma, e actitud no tal cambia. Ta sigui haya hobennan cu arma di candela. Diasabra ultimo tabatin un incidente unda cu a detene un hoben haya cu cuchiu den su poder ora cu el a acudi na un evento deportivo. E hecho

aki a sosode den oranan laat di diasabra atardi. A pidi presencia di patruya na un veld di bala na Pos Chikito unda supuestamente lo tin un pelea formal tumando luga.

Ya caba na e sitio, un ciudadano ta indica e patruya unda cu e grupo problematico a cana bay. Nan a topa berdad cu un grupo di cinco mucha homber di cual dos

di nan, ora cu a mira e auto di polis, a core bay den direccion diferente cada un. E otro tresnan a keda para manera standbeeld. Nan version di e sucedido ta cu nan tabata wak un wegá di bala ora cu un auto Toyota Yaris preto a yega para cerca di nan. Algun mucha homber a baha for di e vehiculo cu machete den man. Nan a haya miedo y a core

bay. Nan a bisa di no tin problema cu ningun gang ni cu e personanan riba veld, y no conoce e mucha hombernan cu machete. Na mesun momento e polisnan a haya informacion via portofoon di nan coleganan na e veld, cu a papia cu un testigo. E persona aki a conta cu e hobennan den e auto preto tabata na e sitio caba prome cu e incidente a tuma luga. E otro grupo tabata hunga futbol. El a nota cu e mucha hombernan menciona tabatin un machete den nan poder y a mira 8 core bay for di e sitio. Un di e mucha hombernan ta bisti cu tshirt cora y a mir'e cu un arma di candela. A dicidi di rista e tres mucha hombernan cu polis a para y bingo. A haya un di e mucha hombernan cu dos cuchiu. Ta trata di e mucha homber di inicial, kende a detene pa posesion

di arma. E otronan cu a core bay ta pa un motibo, probablemente nan lo tabatin un of otro arma den nan poder. Den un otro caso cu recientemente tabata den Corte, un mucha homber cu ta menor di edad ta acusa di a hinca un otro 4 biaha cu un cuchiu y ta core e riesgo di bay cera pa basta aña. Mayoría di esnan envolvi den e caso di hincamento, entre agresor, victima y testigonan tabata muchanan, incluyendo uno di 13 aña. Nan tabata den oranan di marduga riba caya den un discoteca. A permiti nan drenta e luga sin controla identificacion. Esaki ta un tipo di control cu mester bini cu ne. Hobennan riba caya y boet pa mayornan cu ta permiti esaki. Hobennan cu arma blanco of di candela ta un problema serio na Aruba.

Miyonario contrabanda di sigaria direccion pa Aruba confisca

ORANJESTAD -- Tin un negoshi di sigaria di contrabanda cu ta masha lucrativo. No ta un biaha cu autoridadnan a confisca un cargamento asina. Si man pasa tabatin otro confiscacion.

Segun por a lesa den publicacion di corantnan di Panama, dia 8 di maart ultimo, Dia di Hende Muhe, den un operacion cu asistencia internacional entre Duana di Panama y Colombia, a recoge riba lama grandi un barco cu

tabata bayendo direccion di Aruba y abordo e tabata transporta 1.4 miyon paki di sigaria, balora na 1.3 miyon dollar.

Segun por a lesa den e informenan, a aresta 8 persona di nacionalidad Colombiano y mester a hazi uzo di armada, fiscalia general y Departamentonan di Duana di Colombia, cu ta esnan cu a bati alarma despues di a haya tip di informacion di un traslado di mercancia.

Cuatro dia prome ya

caba tabatin un confiscacion, na un haf na Panama, di 81 "paca di sigaria". Un caha tin 50 carton (cada carton 10 Miyonario contrabanda di sigaria direccion pa Aruba confisca paki). Esaki ta nifica cu a confisca 4.050 carton di sigaria, di diferente marca, balora na un poco mas cu 810 mil dollar. Contrabanda di sigaria ta un mercancia cu facilmente y den forma rapido por bira placa pa e organisacionnan criminal.

Aruba e firma acuerdo cu Reino Unido

ORANJESTAD -- Recientemente Aruba a firma un acuerdo bilateral (MoU) cu Reino Unido di Gran Britania y Irlanda di Norte. Esaki a wordo firma entre Directie Luchtvaart Aruba y e autoridad di aviacion civil di Reino Unido. Aki ta trata di un MoU relaciona cu transporte aereo cu ta regula derechonan di transporte aereo di e aerolineanan di ambos pais riba e rutanen entre ambos pais. E acuerdo ta segun

e principianan di "open skies", cu ta un maneho liberal sin restriccion y limitacion pa loke ta capacidad y frecuencia di vuelonan. E maneho aki ta esun di mas efectivo pa maximalisa airlift, cual ta hopi importante pa Aruba su turismo. Tambe ta importante pa remarca cu e acuerdo firma ta habri porta pa vuelonan directo entre Aruba y Reino Unido, di cual dia 26 di maart 2023, British Airways lo efectua su prome vuelo

entre London Gatwick y Aruba. Siguiyemente Aruba lo sigui e proceso cu e autoridadnan di Reino Unido pa converti e acuerdo aki den un tratado. E acuerdo aki ta forma parti di e strategia di Ministerio di Transporte pa sigui expande Aruba su infraestructura di acuerdonan bilateral di transporte aereo, pa asina crea mas posibilidad pa airlift y conexon, cu di su parti lo genera y stimula desarrollo economico.

Aruba tin Ministernan miyonario

ORANJESTAD -- Pueblo di Aruba ta sigui bira mas poberbou gobernacion di partidonan MEP y RAIZ y por lo pronto no tin solucion na bista caminda hasta tin cu teme cu e situacion financiero di ciudadanonan di e pais, lo bira ainda mas pio. E situacion financiero di pueblo ta birando dia pa dia mas y awe na comienso di siman, cantidad grandi di casnan rond di e isla, ta lanta cu e duda grandi con nan tin cu pasa e siman aki.

Parlamentario pa fraccion di AVP, Arthur Dowers a musta cu pueblo ta bibando momentonan dificil, momentonan di lucha con-

stante pa tene cabes riba awa ya cu no tin fin na e mal maneho di e actual gobierno. "Realidad di e situacion di nos pueblo, ta cu mientras cu nan ta mira nan placa bira menos tur siman, tin un gobierno ta birando super rico pero no rico pa yuda pueblo cu e miyones cu nan a ricibi for di mesun pueblo pover aki pero pa nan propio rikesa. Ministernan di gabinete Wever-Croes II ta bibando den gloria, cumprando autonan di mas caro cu tin, biahando pa tur parti di mundo, yudando friends & family mientras cu pa pueblo gobierno no tin duna absolutamente nada."

HULANDA

Promé tormento di aña

VLISSINGEN – Na un kantidat di sitio kantu di kosta djaluña mèrdia a midí e promé tormento di 2023. E bientu fuerte a kousa hopi daño. Na Vlissingen un persona a resultá heridá despues ku bientu e bent'e for di un trapi.

Komo konsekuensia di e wer turbulento, a notifiká aksidentenan di tráfiiko, palunan ku a kai i kuránan ku bientu a supla benta

abou. Asina bientu a benta un trùk di entrega riba Rottepolderplein. Tambe poko mas aleu, na Boesingheliede, bientu a benta un trùk di karga banda di kaminda.

E forsa di bientu mas fuerte a keda midí na Vlieland, IJmuiden, Houtribdijk i IJsselmeer. Ei nan e pro medio entre 1'or i 2'or tabata forsa di bientu 9.

Ku esaki, segun Weerplaza, tin menshon ofisial

di e promé tormento di aña.

Pa Flevoland, Groningen, Friesland, Zuid i Noord-Holland, tabatin kódigo hel debí na forsa di bientu fuerte. Den e parti nortwèst a alkansá veloci-dat di bientu di un 100 kilometer asina pa ora, KNMI a informá.

E pronóstiko ta ku bientu lo sigui baha den transkurso di atardi i anochi.



Denunsia pa gans den kas

GRONINGEN – Djasabra a salba dos gans for di un kas kaminda miembronan di e organisashon di studiante di Groningen,

Vindicat, ta biba. Esaki ambulans di bestia ta bisa, ku a hasi denunsia kontra e studiantenan ku tabatin e gansnan.



E kaso a sali na kla despues ku un foto a drenta na e site di notisia di Groningen, Sikkom, di un kamber di studiante ku un krus di hak grandi riba e muraya i un gans dilanti e bentana. Momentu ku ambulans di bestia a mira e foto, mesora nan a bai na e kas i a bai ku e gansnan.

E miembronan di Vindicat ku ta biba den e kas, seguidamente a keda suspendé.

Marian Ubels, tabata un di e trahadónan di ambulans di bestia ku a bai na e kas djasabra. El a bisa

RTV Noord ku e tabatin kontakto ku un di e studiantenan ku tabata enbolbí na e akshon. “E tabata en realidat un chansa di un di e studiantenan, kende ke a laga henter e kamber di e studiantenan di promé aña bou di pupu.”

Ubels: “Pues mi e pidié: ‘Bo a realisá un momentu kiko esaki ta nifiká pa e bestianan, ku bo ta kue for di un kunuku i laga normalmente kana sin meta den e kas’. El a bisa ku e tin hopi duele, pero ku en realidat e no a para ketu kiko esaki ta nifiká pa e gansnan.”

Segun Ubels, ainda no ta bai bon ku e gansnan. Nan ta temporalmente serka nos, pa bini bei un poko i haña e alimento korekto. “Mi no por bisa kiko a sosodé, pero nan tin miedu ku normal papiá. Nan tin mester di tempu, gewon nan mester haña forsa bèk.”

Direktiva di e organisashon di studiante di Groningen ta laga sa ku a suspendé e studiantenan di e kas pa un aña. Esaki ta nifiká ku e miembronan no por partisipá na aktividatnan di e organisashon.

Diesdos aña di prizòn pa mal uso di mucha

LIMBURG – E mayornan di kuido ku a hasi mal uso di shete mucha, ámbos mester sinta 12 aña den prizòn. Banda di esei, e hòmbes a haña tambe TBS. Pa e muhé, lo mira na final di su kastigu kon grandi e chèns ta pa ripitishon. A base di esei ta disidí sí e ta haña tratamentu, òf tin mester di supervishon. E duo mester paga tambe daño di perhuisio di un total di 79 mil euro na e shete muchanan.

Peter S. di 59 aña di Beegden i Nancy D. di 54 aña di Herkenbosch, a hasi

mal uso di e muchanan entre 2019 i 2021. E muhé durante e periodo tabata aktivo komo kudadó den e region di Eindhoven. Durante kuido e hòmbes tabata mira huntu e mal uso via yamada di video i tabata duna instrukshon.

Tambe D. a droga su propio yu dos biá na kas pa partisipá na fantasia seksual di e hòmbes. E muhé mester paga un mucha muhé tiner un daño di perhuisio di 3385 euro.

Ministerio Públiko a eksigí 15 aña di prizòn i TBS ku kondishon pa tantu

S. komo D. Tambe Ministerio Públiko ke pa nan paga 5 mil euro pa kada mucha pa filma i mal uso, plús 30 mil euro pa otro daño i perhuisio.

Nunka konsolá

S. i D. a siña konosé otro via di un site di enkuentro, pa despues a haña un relashon ekstremo. Nan dos tabata kompartí interes di sèks di bestia i nasismo i a kuminsá ta fantasiá tokante sèks ku e muchanan.

D. seguidamente a inskribí su mes riba dos web-site di kuido. E lo a

haña preferensia pa kuido di muchanan bou di kuater aña, pasobra tòg nan no por kòrda i opseshoná.

E mal uso por a sigui un aña i mei, te na momentu ku un di e mayornan a mira

imágen for di e kamber di mucha, kon nan yu di dos aña tabata keda mal usá. Tambe nan a mira ku un hòmbes tabata mira via di konekshon di video. Djis despues a detené D. i S.



STATIA/SABA/ST. MAARTEN

Di ocho edishon di Statia Doet

Tantu djabièrnè komo djasabra, Ofisina di Labor di Gobièrnu di St. Eustatius, den koperashon ku Oranje Fonds, a tene e di ocho edishon di Statia Doet. Esaki ta e evento di mas grandi di boluntario na St. Eustatius.



Atvertensia di Brantwer

GREAT BAY – Brantwer ta hasi un yamada na komunidad pa ta kouteloso kiko ta tira afó, manera sigaria sendé, òf lusafè ku por resultá den kandela di mondi den áreanan kaminda tin yerba seku.

Ta pidi personanan ku ke sende sushi òf yerba seku na kandela den áreanan habitá, òf riba seru pa aktividatnan agrikola, pa promé ku nan hasi esaki pa tuma kontakto ku Brantwer pa konseho.

Uso di kandela no a-

propia pa pone bida di hende na peliger, propiedat i e ambiente den e kondishonnan di wer seku ku e pais aktualmente ta konfrontando.

Kandelanan por sali for di man i plama rápidamente debí na biento fuerte okashonando daño na bida i propiedat di otro.

Un persona por yuda redusí kandela di mondi dor di aktua responsabel siguiendo e konseho menshoná di Brantwer.



Pion na entrada di Lambert Hassell Road

THE BOTTOM – A instalá un pion nobo riba e kaminda ku ta kondusí pa Anglican Church na Windwardside.

Frekuentemente ta usa e kaminda komo sitio pa parker. Esaki ta kousa problema pa habitantenan ku ta biba kantu di e kaminda,

kendenan no por sali for di e kaminda. Esaki ta preokupashon di e habitantenan ku mester bandoná nan kas den kaso di emergencia.

E kaminda ketu bai ta habrí pa públiko i awor ta diseñá solamente pa kana na pia. Esnan ku ta biba banda di e kaminda, ketu

bai por usa e kaminda ku nan propio vehíkulo i baha i deskargá karga.

A pone e pion pa mira si e situashon ta mehorá. Ta pidi pa parker outo na e sitio di parker designá i otro lugánan banda di Lambert Hassell Road.

STATIA/SABA/ST. MAARTEN

Konsulta ku Ombudsman

**THE BOTTOM/
ORANJESTAD (EUX)**

--Di 20 pa 24 di mart un tim di Ombudsman Nashonal ta atrobe na Saba i St. Eustatius pa konsulta. Habitantenan por akudí grátis na e oranan di konsulta pa hasi pregunta òf entregá

keho tokante instansianan gubernamental. Hendenan ku pregunta òf keho tokante por ehèmpel Servisio di Impuesto, Ministerio Públiko, Polis, Entidat Públiko, e instansia di kuido pa hubentut Karibe Hulandes, ZJCN, por akudí serka e

tim di Ombudsman Nashonal Ombudsman di Mucha. E konsulta na Saba ta djalu-na 20 di mart di 9'or pa 11'or di mainta na Ofisina di Turismo na Windward-side i djarsars 21 di mart di 3'or pa 5'or di atardi na Windward Roads Office,

The Bottom.

Na St. Eustatius oranan di konsulta ta djaweps 23 di mart di 9'or pa 11'or di mainta na Lions Den na Concordia i djabièrnè 24 di mart di 3'or pa 5'or di atardi na GvP School na Oranjestad. Durante tur e oranan di

konsulta ta posibel pa hiba kombersashon na hulandes òf ingles.

Hendenan ku ke hasi pregunta òf entregá keho ku no ta akudí na e oranan di konsulta, semper ta posibel pa hasi esaki via di e otro maneranan.

Polis aktivo na SXM Doet

PHILIPSBURG -- Den e espíritu pa duna bèk na e komunidad di St. Maarten, agentenan polisial a parti-

sipá na SXM Doet, pa ehekutá diferente proyekto komunitario rònt e isla.

E agentenan a traha ku

diferente organisashon, manera e ofisina di Ministerio Públiko, pa fèrf diferente lokal di klas na Milton Peters College. Un otro grupo di e agentenan a asistí tambe ku un tour, organisá pa adulto mayó di St. Maarten. Tim di maneho di Kuerpo Polisial St. Maarten ta hasi uso di e oportunidat akí pa gradisí tur e personal i otro organisashonnan no-gubernamental, pa a partisipá na e evento di komunidad importante akí.



DEPORTE

Plei-òf biliart bola8 ta sigui djaweps

KRALENDIJK--Plei-òf kampionato 2022-2023 di biliart bola di nos isla ta sigui djaweps awó 16 di mart 2023 mitar di ocho anochi den sala di biliart di Kompleho Deportivo Jorge Nicolaas na Kaya Amsterdam.

Pa djaweps awó ta enfrentá otro e ekiponan Az-

teca di Nort Saliña i Mastertouch di Kaya Nikiboko Sùit.

E partido aki ta primintí di bira otro tremendo partido di e plei-òf, esaki ku dos tremendo ekipo buskando e viktoria pa mira kua di nan dos lo baha kabes pa otro.

E partido aki pues ta unu bastante interesante

djaweps awó.

E ekipo di La Tropicana ta na kabes di e plei-òf.

Abo fanátiko di e deporte di biliart Bola-8 no pèrdè e partido aki djaweps awó mitar di ocho anochi aya na Kompleho Deportivo Jorge Nicolaas na Kaya Amsterdam.

La Tropicana na kabes plei-òf biliart

KRALENDIJK--E tim di biliart di Rincon ku ta La Tropicana, ta na kabes di plei-òf kampionato biliart bola-8 di nos isla di Boneiru.

E tim di La Tropicana ta sin partido pèrdí den e plei-òf, invikto pues ku 2 partido ganá.

Posishon ekiponan.
La Tropicana 2 wega

ganá 0 pèrdí, 10 sèt na fabor 7 kontra, averahe 3 sèt.

Mastertouch 1 ganá 0 pèrdí, 5 sèt na fabor 1 kontra, averahe 4 sèt.

Azteca 0 ganá 1 pèrdí, 3 sèt na fabor 5 kontra, averahe -2 sèt.

The Untouchable 0 ganá 2 pèrdí, 5 sèt na fabor 10 kontra, averahe -5 sèt.

Resultado beisbòl Kopa Lito

KRALENDIJK--Awe nos ta duna publisidat na resultadonan di e weganan di beisbòl di siman pasá di nos futuronan, esaki pa loke ta trata Kopa Lito i WolfPack Foundation.

E torneo a sigui den su diferente ketagorianan.

Kategoria U6.

Dreamers C a gana Dreamers A 17-16.

Wolfpack A a gana Wolfpack B 13-7.

Stars a gana Dreamers B 10-5.

Wolfpack B a gana Dreamers C 20-10.

Kategoria 12U.

Stars a gana Wolfpack A 9-5.

Picher ganador ta Julian Garcia.

Dreamers a gana Wolfpack B 7-2.

Picher ganador ta L. Me-laan.

Stars a gana Wolfpack B 9-4.

Picher ganador ta Gabriel Garcia.

Kategoria 16U.

Wolfpack a gana Stars 17-12.

Picher ganador ta Dshawn Ignacio.

Dreamers a gana Wolfpack 11-9.

Picher ganador ta Joshua Cuevas.

Jalvicar B.V.

ta buska

- 2 auto-monteur

- mester tin 3 aña di eksperensia
- ku por traha den tim i hopi responsabilidad.

Inf. tel. **+599 717-3163 / 777-3546**

DEPORTE

Boneiru ku 2 kampion

KRALENDIJK--Djasabra 11 di mart a tuma lugá entrega di premio kompetensia weganan Eskolar Interinsular Bonaire. Na e okashon, Serapio Pop, a bisa: “Mi ta kontentu ku 2 kampion a bai pa Boneiru. Nos a traha duru e temporada ku a pasa i el a duna resultado.”

Terrence de Jong a felisitá e partisipantenan. “Pabien na tur ku a parti-

sipá. Awor fin di mart ta sigui na Kòrsou i aprel na Aruba ku weganan Eskolar Interinsular. Mi a studia na e islanan Kòrsou, i Aruba, despues Merka i awor mi tei pa sigui traha pa Boneiru.”

Diputado Kroon tambe a hiba palabra. a“E tim di Boneiru a hasi bon kompetensia. Mi ta gradisí e grupo ku a organisá henter e aktivitat. Sigur e tabata

un éksito. Esaki ta un inisio pa loke nos ta sinti nos parti di otro. Pabien pa tur ku a partisipá.”

E kabesante di e delegashon di Kòrsou, a konta kon tempu e tabata mucha, tambe el a pasa den e weganan aki. Ta trata di 20 aña pasá. El a bisa esaki ta un eksperensia grandi pa e muchanan. “Boneiru a hasi un tremendo aktivitat, hopi bon organisá.”



Kas nobo pa Indy

KRALENDIJK – Fundashon Kunuku Kavelvers gusta kompartí notisia di adopshon bunita, pero awe



tambe ke enfatisá kon kontentu e fundashon ta ku famianan adoptivo.

Chanel, awor Indy, ta un bunita ehèmpel kon bunita esaki ta pa e kachó, esnan ku a aport'è i e fundashon. Durante e último simannan, Indy a bin pasa bou di kuido pa un famia adoptivo, ku un base grandi di amor.

Indy a bai Hulanda i awor ta kanando riba suela hulandes trankilamente. E por konkistá mundu. Komo ku e akohida di bestia di Kunuku Kavelvers ta inkreiblemente yen, tin un kantidat di kachó ku no ta haña un chens pa adopshon asina lihé.

Asina tin kachónan ku ta den akohida pa luna i aña i tin di nan ku ya despues di algun siman nan ta den kuido adoptivo.



CHANGAN WORKFORCE

3 YEAR WARRANTY

M201 SEVEN SEATER



\$13,995

M401 ELEVEN SEATER



\$17,995

MS201 DOUBLE CABIN



\$15,995

M401 CARGO



\$14,995

MD201 FLAT BED



\$12,995

M201 CARGO



\$11,995

MD201 COOLING BOX



\$17,995